



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

**James Franklin Sunrisers Hyderabad
pace bowling coach kumogo**

**Washington DC nung Nikki
Haley-i Trump akok**



VOL. XXI ISSUE NO. 142 (ADOK 142) DIMAPUR SANGTENNÜ (TUESDAY) METSÜREMI (MARCH) 05, 2024 ₹ 5.00

Dmr aser Cmu nung auto rickshaws aika puogo

Dimapur, March 4, 2024 (TYO): March, 2024 nungi auto rickshaws display card system tenzükba sülen Dimapur aser Chumoükedima district tem nung auto rickshaws aika puogo ta Dimapur Police-i metetdaksü. "Inyakyim tasenba sülen manidakba agi auto rickshaws apu. Nüngdakba kulikakettem sayuba sülen senchi kecha melii chiochtsü. Display card agizüksü atema mapang peria dang agütsüogo nungji joko mapang talila magütsütsü" ta Commissioner of Police Dimapur, Kevithuto Sophie-isa. Iba system tasen ya auto

drivers mesüra kiburtem nem timtem agütsütsü atema masü saka drivers o passengers kumzüka ayutsüba den traffic timi ketdangsütsü atema lir, ta Kevithuto Sophie-isa ashi. Auto rickshaws display card system ya December 2023 nung tenzük aser iba ya Commissionerate of Police kübok district asem- Dimapur, Chumoükedima o Niuland nung auto rickshaws tiptemtsü atema lir. Auto rickshaws display card agizüksü atema tatembangba anogoji February 29, 2024 nü liasü.

Mon nung NSCN-K züngsem 1 khaset; 1 apu

Kohima, March 4, 2024 (Agencies): Nagaland kübok Mon district nung NSCN-K züngsem ka khaset aser ka apu. Iba mapang prangpong, injang, tapoktsütem aser tanga oset aika ngutetogo, ta Ministry of Defence-i Hombarnü metetdaksü. Mon district kübok Sangsa yimtsüng nung telungpur kar senzüsenbongba osang tejangja ka angazükba sülen Assam Rifles-i yasüng ayaterm nung

mapa tenzük ta Ministry of Defence-i ashi. Assam Rifles sepaitemi telungpurtem mita aodang parnok dak injag khaloktsü aser iba jagi sepaitemi meyipen telungpurtem den khatap. Idangji telungpur ka khaset aser ka apu ta Ministry-isa ashi. Iba tesem nung automatic rifle ka, automatic pistol ka, grenades, injang aser tanga osettem aika ngutetogo ta parnokisa ashi.

Manipur nung Myanmar nunger 6,746 putetogo

Imphal, March 4, 2024 (Agencies): May 3, 2023 nungi February 27, 2024 tsüngda ozüng alema aruba Myanmar nunger 6,746 putetogo ta Manipur Chief Minister N Biren Singh-isa ashi. Myanmar nunger 259 indang biometric data collection asüba sülen meyipa yokogo aser tanüngbatem temporary shelters nung yua lir, ta pai ashi. Hill Areas Committee nungi D Gangmei menden ser reconciliation team kati assembly session nung madenba MLA tem den olemteptsü, ta CM Biren-i metetdaksü. Manipur state nung yimjung

aser tesünap arutsü atema mapa inyaksü nüngdaker, ta paisa shisem. Paisa nübertem dang lenmang aser national highways nung donations mesüra taxes mesarutsü mepishia metetdaksü. Manipur nung kin o kin mangatetep adokba sülen tasür 114 kibong shia nem ex gratia payments agütsüogo aser tanüngba tasürtem asoshi inyakdar ta Biren Singh-isa ashi. Kin o kin rara ajanga internally displaced persons (IDPs)-i khuret jenti ajurur aser parnok nem teyari agütsütsü atema relief camps 320 lapoka lir, ta paisa shisem.

Mizoram sorkari Myanmar, Bangladesh & Manipur refugee tem yaritsü

Aizawl, March 4, 2024 (Agencies): Mizoram sorkari Myanmar, Bangladesh aser Manipur nungi arua jenoka alir nisung 42,000 tema nem teyari agütsütsü nangzükshio. Myanmar aser Bangladesh nungi asylum meshirtem den Manipur nungi arurtem osang tejangja magütsüteter ta Mizoram home minister K Sapdanga-i Hombarnü assembly nung ashi. Mizoram nung Manipur nungi nisung 9248, Myanmar

nungi 32,161 aser Bangladesh nungi 1167 jenoka lir ta Mizoram home department-i ashi. "Onoki Myanmar aser Bangladesh nungi asylum meshirtem den Manipur nungi internally displaced persons maneni yaritsü" ta Sapdanga-i ashi. Myanmar, Bangladesh aser Manipur nungi arurtem yaritsü atema Centre sorkari taoba Mizo National Front (MNF) sorkar nem Rs 3 crore lemsütsü ta pai ashi.

SEC Nagaland-i ULBs atema E-Roll reprangshimtsü metetdaksü



Kohima, March 4, 2024 (TYO): Nagaland State Election Commission (NEC)-i municipal aser town councils nung electoral roll reprangshimtsü osang metetdaksü. Urban Local Bodies (ULBs) election magidang special summary revision agütsü ta NEC-i ashi. "March 8, 2024 nü electoral roll indang draft publication inyaksü aser March 11 nungi 20 tashi claims and objections atema mapang lapoktsütsü" ta State Election Commissioner (SEC) T. John Longkumer-isa ashi. March 21 nungi 27 tashi claims and objections angadanga bentetsü aser March 28 nungi April 3 tashi pei pei appellate authorities nung temepishiba agütsütsü akok. Iba sülen April 4 nungi 6 tashi nung appellate

authorities-i ken o tem angadanga tembangtsü, John Longkumer-isa ashi. April 8 nungi 10 tashi appellate authority indang lemtetem yanglushitsü aser April 12 nü electoral roll indang final publication asütsü ta paisa ashi. Nagaland nung Municipal aser Town Councils elections atema Municipal aser Town councils 39 nung Electoral Roll revise aser update asütsü nüngdaker, kechiyong November 24, 2022 nung revision tatemsabuba agia liasü ta State Election Commissioner-isa metetdaksü. February 27 nü Nagaland sorkari Municipal aser Town Councils nung Special Summary Revision of Electoral Roll asütsü mulunga agizük, ta pai ashi. Iba special summary revision

atema qualifying date ji January 1, 2024 asütsü, ta SEC-isa ashi. ULBs 39 nung wards 418 aser polling stations 693 nung 3,60,115 voters lir ta November 2022 summary revision ajanga ashir. Election Commission-i election agütsü osang aser election ketdangsürtem training atema ano mesangoktsü lir. ULBs election atema state sorkari security reprangtsü ta John-isa ashi. Electoral Roll indang Special Summary Revision nung Enumerator(s)/ Supervisor(s)/ Sector Magistrate(s) mesüra tanga nisungtem meshimtsü. Claimant/objektor-i indangindanga ERO dangi zülutsü aser iba atema ERO nem osang agütsüogo, ta paisa ashi. State sorkari aiben ULBs election agütsü atema sangdonga liasü saka kin teloktem aser civil society organisations (CSOs)-i tetsür nem 33% lemsütsüba den ali aser kiojen nung tax agütsü magizükba ajanga thinena aru. "Kobi melii Lok Sabha elections agütsü osang sangoktsütsü aser SEC-i iba den külemi ULB elections agütsü asü masü lemtet ka agütsü" ta John Longkumer-isa metetdaksü. SEC John Longkumer-i osangbener den jembidang State Election Commission nung Under Secretary Tsutsove Kupa dena liasü.

Mkg nung 33/11kV tesangwa tashi agütsüba sub-station 2 amenok



K.G Kenye-i Mokokchung nung sub-station ana lapoktsü dang pa den MLA & Advisor Tongpang Ozüküm, sorkar ketdangsürtem aser sentong nung tongti shilem agirtem noksa nung angur.

Mokokchung, 4th March (TYO): Mokokchung nüburtem asoshi tepelatsü osang kaji March 4, 2024 nü Minister for Power and Parliamentary Affairs, Govt. of Nagaland, K.G. Kenye-i electricity tesangwa agütsüba sub-station ana meraketa lapoktsüogo. Iba sub-station anaji - Salangtem Ward nung aliba Power House nung 33/11kV, 2x10 MVA, aser kaja tashi aliba 33/11kV, 2x5 MVA, Medical Colony, Majakong Ward, Mokokchung nung lir. Sub-

station anaji amenokba ajanga Mokokchung aser temeket alirtem light tesangwa tajungba akümba den nübur rongsenketzung jenjanga ajungkettsü imlar. Tanü Minister K.G Kenye-i iba sentong nung jembidang, maparen ajak nung tatalokba otsü balala alir, saka tanü lapokba project otsü yabo tanga dang nungi khenyongi balaka lir, kechiyong iba yabo ali nung remer aliba shia aruba den saku lir. Ya takok ngutetbaji tongtibangsa lungjemer

merangba ajanga lir, anungji, iba dak sentakba nung teyariteper ajak pelaba metetdaksü. Alima nung tengutetba aika rongnung tesangwa tashi (power) ya-a tongtibang ka lir, tanü tesangwa tashi melira kecha meinyaktetsü. Tesangwa melira alima koda alitsü? Tanü shir linük nung power peria ngutettsüsa tashi lir, par lima nungji maparen jenti inyaktetba den alima tejakleni oteter, ta pai ashi. Asen lima asenoki electricity tashi madokdaksütetba ajanga sen crore aika intoka tangar dang nungi alia amshir. Asen lima nunga electricity adokdaksütsüsa mapatong balala inyaksü sentong lir. Tzüla (Dikhu) ayong anasa power project balala inyaksü tang asameyangba agidar, itemji mapa kümra asenok lenmang aisü nung tajangzük angütsü. Tanü Mokokchung nüburtem amalitep ajanga koba sub-station ana lapoktetogo, yamaji tarutsü nunga nenok amalitep aser tenungitba maneni akanger, ta paisa ayongzük. Iba sub-station ana ya "Government indangji odang tokjang" ta masü, saka pei meyong amai meima amshitsü asoshi paisa shisem. (Maneni tapak 2 nung...)

IRCSN ketdangsür tasen shimogo, ambulance tasen ka agütsü



IRCSN tir aser Nagaland Angh, La Ganesan-i March 4, 2024 nü Raj Bhavan Kohima nung IRCSN chairman inyaksü Minister P Paiwang Konyak agizükba noksa nung angur.

Kohima, Metsüremi/March 04 (TYO): Indian Red Cross Society, Nagaland State Branch ajanga Chairman IRCSN mapa nung aniokba aser IRCSN tir aser Nagaland Angh-i tenlaba Ambulance tasen ka semzükba sentong ka March 4, 2024 nü Dr. Imkongliba Ao Hall, Raj Bhavan, Kohima nung ayongzüka agia liasü.

IRCSN indang tir aser Nagaland Angh ajanga Minister, Health and Family Welfare, P Paiwang Konyak ya Indian Red Cross Society Nagaland Branch indang chairman ama mapa nung anioka liasü.

Pa kümsük nung timtemertem meimba aser meimchirtem bendanga agütsür tenzükba alitsü imlar, ta Nagaland Angh La Ganesan-i ashi.

Iba sentong nung adenertem dang pai ashiba agi, Health and Family Welfare indang minister

ya health aser meimchir yariba mapa nung tesendaktep aliba mechi Indian Red Cross Society Nagaland Branch indang chairman mapa inyaker.

State nung nüburtem indang health delivery system nung tekolak ka ama minister aser par ketdangsürtemi inyaksü mapa jenti lir, ta ashi.

IRCSN tiri maneni chairman tasenba dang health care aser humanitarian assistance tsünga tesendaktep adokdaksütsü aser nüngdakba mapang kata mezüdoki yaritsü ajungshia liasü.

IRCSN indang chairman tasenba aser Minister, Health and Family Welfare, P Paiwang Konyak-ia pa nem iba maongka agütsüba atema IRCSN state branch aser Nagaland Angh dang pelaba lemsatep aser Red Cross ama lokti tentet tanü tensa nung ajungben rongdak mapang telangzüba agütsütsü renema alitsü tongtipang ta ashi.

Pai maneni nüburtem dang lungjemer inyaksü ayongzüka liasü.

Paisa Indian Red Cross Society indang inyakyim nung shilem agir ajunga nem tenüngsang agüja liasü.

Iba sentong nung IRCSN general secretary Akhale V Khamo-i IRCSN indang osang agütsü aser Temjentiba Ao ajanga temeja ken ka aten.

Iba sentong nung Advisors, MLAs, Deputy Commissioner Kohima, Directorate of Health and Family Welfare aser IRCSN nungi ketdangsürtem dena liasü.

Iba sentong nung menden ya IRCSN züngsem Johnny K Ruangmei liasü, Pastor, Rengma Baptist Church Kohima Jonathan Mese-i Tsüngrem temoatsü meshia sarasadem aser Vice Chairman IRCSN, Sawathang Kez-i melepzüng o jembia liasü.

Mkg nung 33/11kv tesangwa tashi agütsüba... (TAPAK 1 NUNGI...)

Sentong nung Advisor & Mokokchung DPDB Chairman, Tongpang Ozüküm; Secretary Power, Asangla Imti IAS; Engineer-in-Chief Power, Er. Moa Aier; Chief Engineer (D&R), Er. Tiameren Walling; Chief Engineer (T&G), Er. Penrithung Yanthan; S.E Mokokchung Circle, Er. Abenthung Ngullie; E.E Mkg Electrical Division, Er. Chutsüsie Thowachu; Ao Senden tir, Chubawati; All Ward Union Mokokchung Town tir,

Limanungsang; MTBA Assoc. Pator, Rev. Temsuwati parnoki shilem balala agia liasü. Sentong lemsadakja Imtikumzuk-i "love remains" ta asüba ken tajung ka aten.

Iba mapatong ya Govt. of India o World Bank na senotsü kasasa (50:50 basis) tsükteper teyari agüja yanglu, aser ibai North Eastern Region Power Improvement Project (NERPSIP) sentong kübok agizüka Ministry of Power, GoI

kübok aliba Public Sector Undertaking 'POWERGRID'-i achayanga inyakba maparen ka lir. Iba mapa ya Feb 2018 nungto ita 33 tsünga renemtsü contract aru saka Power House nung ali dak sentakba ken-o kar aliba ajanga merenemteti mapang talangka atsülanga aru, saka tia junga iba keno ji Nov 2021 nung tembang. Power House nung yangluba sub-station-ji sen 9.4 cr., aser Medical Colony nung alibaji 8.9 cr. jenjang lir.



Tanü March 04 nü Dimapur Govt college Alumni Center, Dimapur nung South Indian aser China nung chiyongtsü anguba restaurant tajung ka 'College Bites' ta ser lapokogo. Iba restaurant ya Dimapur Govt College nung principal Prof. Sanjay Sharma semzüksü aser Dimapur Ao Baptist Arogo nung sannüker Rev.I.Watii meshiteta sarasademtsü. Iba restaurant nungi online nunga Zomato aser Swiggy ajanga chiyongtsü meshia chitetsü aser ano benjong aser lokti senden nunga soruchioka agütsütetsü. Kaketshirtem alidak asüba agi iba College Bites nung chiyongtsü jenjang dalangba agi angutsü. (Dimapur, March 04,2024).

MULUNGNEN O



Asür. Mr. Toshimongba Aier (Longpa) 07.01.1946 nungi 27.02.2024

"Kechiaser pai kü dang meim nungji ni pa kümzüksü; pai kü nüng shitet nung ni pa temalen mendaksütsü". T.Ken 91:14

Onoki teti meima aliba Kinungbo, Obala aser Obula; akümüli arishi Tsüngremer temoatasü nung talangka moaja lia arur, mapang tetemsü nung iba akümüli tembanga kibubai jar aoba mapangozü mangyim tia nung alidang kija kibong,arogotem, yimer-yimsanger, adianutem, loktibalala, tembartem ana aser talang nungi shirnokisa sarasadem den nübu, rongsen aser shisatsü agi yariogo, nenok ajak dang temolong ajak agi kangasa pelaba lemsateper.

Nenok aria bilemba temeim mapa tajung asoshi asen tulusang Tsüngremer maneni moajangma.



- Temeim Kinüngtsü, Chirnur, semchirtem, Anükapang aser Kinüngertem.



St. John's school Changtongya nung tanü March 4, 2024 anogo nung tila tanurtem Ao oshi tajungba nung jangjajangja angazüktetsü mechi nung L. Aküm Jamir (Ao Tesayur) ajanga züluba kaket ka tebu tedi P. Renthly Jamir-i sayaogo. Kasa sentong nung P. Onen Lkr, area Education officer-i tajungshi o jembia. Iba kaket ya class - I matongdang tanurtemi pei oshi meteta angazüksü asoshi kanga tapet ka lir. Aor tila tanurtem pei oshi angazüknerntem aginera iba contact nung jempiangma. # 9862191014 / 9862364313

DC & DEO Kohima ajanga Arms License alir dang metetdaksür

Dimapur, Metsüremi/March 04 (TYO): Lok Sabha atema general election agitsü aliba mechi Deputy Commissioner & District Election Officer,

anasatiba Police Stations dangi March 15, 2024 tashinung Arms License(s) bener arua sayutsü metetdaksüogo.

Kohima, Kumar Ramnikant, IAS ajanga Kohima district kübok Arms License alir ajak dang verification atema Arms License nung agüja aliba ama

Iba sangdong sülen manidaker indang arms license(s) agientsütsü aser ozüng agi melaba ama mera agitsü, ta sangdong ka ajanga ashi.

Mokokchung nung EEM aser Nodal Officers training agütsü

Dimapur, Metsüremi/March 04 (TYO): Aruya aliba 18th Lok Sabha elections 2024 dak sendakba nung Expenditure Monitoring Team (EEM) aser Nodal Officers of Enforcement Agencies atema anogo ka training March 4, 2024 nü Deputy Commissioner, Mokokchung indang Conference Hall nung agia liasü.

i election tajungtiba nung agitsü asoshi nunglokja aliba ketdangsürtem mapa teinyaksü indang tongmelang agi lemsatepa liasü.

Assistant Election Officer, Mokokchung, Renben Mozhui-

Er. Mechietsho Koza, EAC Chuchuyimlang aser Nodal Officer for EEM ajanga Election Expenditure Monitoring indang guidelines tem PowerPoint presentation agüka liasü, kechiaser election yimya shidak aser tesunep nung agitsü atema iba yagi tongti shilem agir.

"My Handloom My Pride"

Nagaland Handloom & Handicrafts Development Corporation Ltd

(A Govt. of Nagaland Undertaking)
Dimapur : Nagaland

Cordially invites you to the



STATE HANDLOOM EXPO (SHE)

HATHKARGHA MELA
Under Aatmnirbhar Bharat Utsav

To be Inaugurated by :

SHRI. KEKHRIEVAR KEVICHUSA

Commissioner and Secretary to the Government Of Nagaland
Department of Industries and Commerce
Kohima, Nagaland

ON 5th MARCH 2024 AT 11:30 A.M
At Kohima Village Ground
Near DBS School, Kohima, Nagaland

Sponsored by :

Office of the Development Commissioner (Handlooms),
Ministry of Textiles, Govt. of India, New Delhi

R.S.V.P
03862-224591
M:8837004946

Vitsutho Nyuthe
Managing Director

PM Modi-i kü dang tai matoktsü ta shiogo: BJP MP Pragya Thakur



Sadhvi Pragya Singh Thakur

New Delhi, March 04

(Agencies): Taruba Lok Sabha election nung tokteptsü atema BJP-i Bhopal nungi party MP, Sadhvi Pragya Singh Thakur meshim, aser iba dak sendakba nung lai, tamalen ni jembiba o kar ajanga Ato kilonser, Narendra Modi mepelar asütsüa akok, ta ashi.

Interview ka nung jembidang Thakur-i, "Tamalen ni ticket memeshi aser tang-a ticket memeshir. Tamalen ni jembiba o kar ajanga Ato kilonser Modi mepeladaksü asütsüa akok, aser pai kü dang tai matoktsü ta metetdakja liasü. Ajisüaka tamalen ni pa dang tatok meshiogo," ta metetdaksü.

Pragya Thakur ya 2008 küm Malegaon bomb lendong ken o nunga tai tonglokja lir ka lir. Taruba Lok Sabha election atema BJP-i Bhopal nungi MP, Thakur melen taoba mapang Mayor, Alok Sharma ang shima tenüng sangdongogo.

2019 küm Lok Sabha election nung Thakur-i Bhopal Lok Sabha menden nungi takok ngua liasü.

2019 küm May ita nung lai, Mahatma Gandhi tepsetsang

Nathuram Godse ya "linük meimer ka" ta jembiba ajanga mangatettep tulu adoka liasü. Iba mapang nungji Ato kilonser Modi-ia lai jembiba oji aija liasü. Iba mapang nungji Modi-i, "Lai tatok meshiogo, saka ni kodanga la dang tai matoktsü," ta metetdakja liasü.

Lai iba o jembiba sülen küm pongu lir tang BJP-i Bhopal Lok Sabha menden nungi la agienadoker.

O s a n g b e n e r t e m i asüngdangba langzüdang Thakur-i, "Tang Bhopal nungi tokteptsü alisang, Alok Sharma atema ni tajungtiba bilemstür. Taruba election nung onoki menden 400 dak tema nung takok angutsü," ta metetdaksü.

"Kü o kar ajanga Ato kilonser yiruja lira aser pai kodanga tai matoktsü, ta ashitsüsa ni jembiba lira ni ibaji metetsümonga inyakba masü. Ni joko yamaji kodanga meinyak," ta laisa shisem.

Honibarnü BJP-i Lok Sabha election atema mezüngbuba list nung candidate 195 sangdong, aser iba list nungji Thakur densema tang aliba BJP MP 33 tenüng densema mali.



March 04, 2024 nü Jharkhand Mukti Morcha (JMM) küm 51 ajungba founday day anogomong sentong nung Giridih district nung Jharkhand Chief Minister, Champai Soren aser taoba mapang Jharkhand chief minister Hemant Soren kinüngtsü (ajichilen), Kalpana Soren nati party nnung inyakertem dak teka ayiploksüba noksa nung angur.

Sübokrem agir MP tem aser MLA tem dang tai matoktsü: SC

New Delhi, Metsüremi/ March 04 (Agencies): Hombarnü Supreme Court-i, House nung o jembitsü mesüra vote atema sübokrem agir Members of Parliament (MPs) tem aser Members of Legislative Assemblies (MLAs) tem dang tai matoktsü; sübokrem agiba atema parnok anema ken o akatsü, ta metetdaksü.

Supreme Court-i, "MP/ MLA kari legislative house vote mesüra onük jembitsü atema sübokrem agira parnok anema ken o akatsü," ta metetdaksü.

Chief Justice D Y Chandrachud-i aniba constitution bench-i 1998 küm JMM sübokrem agiba ken o dak sendakba nung agütsüba obendang anema obendang agütsü.

Advocate kati, "Supreme Court nung judge teneti akümba bench kati, Parliament nung tasüngdangba asüngdangtsü mesüra Rajya Sabha nung vote agütsütsü atema sübokrem agibaji linük temzüng alema lir, ta obendang agütsügogo, anungji iba özüng alema inyakertem dang tai matoktsü," ta metetdaksü.

Supreme Court obendangji pelaa agizüka Ato kilonser Narendra Modi-i X ajanga, "Swagatam. Supreme Court-i obendang tajung agütsüogo, iba ya ajanga yimtenren merüktetsü aser nüburtemi inyakyim nung tamang katettsü," ta metetdaksü.

Chief Justice of India (CJI), DY Chandrachud-i, "Iba ya ajaki melungtepa agiba telemtetba lir," ta metetdaksü. Yaküm September 20 nü

Supreme Court-i 1998 küm PV Narasimha Rao Vs State (CBI) ken o dak sendakba nung obendang agüja aliba reprangshitsü atema telemtetba agi. Taoba mapang Jharkhand assembly nung Jharkhand Mukti Morcha (JMM) nungi MLA, Sita Soren-i 2012 Rajya Sabha elections nung vote agütsütsü atema sübokrem agia liasü. Iba mapang nungji judge pongui akümba bench nung judge aseme House nung sübokrem agir MP aser MLA tem anema ken o makatsü atema vote agüja liasü.

Yaküm October ita nung judge pongui akümba bench kati 1998 küm Supreme Court obendangji metongshitsü atema telemtetba agi aser tang iba dak sendakba obendang agütsür.

ISRO Chairman, Somanath-i pa dak Cancer putetba sangdong

New Delhi, March 04 (Agencies): Indian Space Research Organisation (ISRO) nung chairman, S Somanath-i solar mission Aditya-L1 khakettsüba anogo nung pa dak cancer tashidak putetba sangdongogo.

India nunger solar observatory mezüngbuba, Aditya-L1 yaküm September 2 nü Sun-Earth Lagrangian point 1 tsütsüleni khaketja liasü aser iba pezü shi jajaba sülen taküm January 6 nü orbit tongogo.

Tawa interview ka nung jembidang S Somanath-i, India nungeri mission Chandrayaan-3 itai yokba mapang nung pa dak temang nung timtem kar liasü, iba mapang tashi nungjibo pa temang nung timtem alibaji kechi ajangar mejangjai liasü, ta ashi.

Paisa, ita ana shi lir sülen Aditya-L1 khakettsüba anogo nung pa dak cancer putet, ta ashi. "Aditya-L1 khakettsüba

anogo nung anepdang ni scan ka agia liasü. Iba mapang nungji ang kü tebok nung langka ainba ni metet. Iba sülen timtemji jangjatsü atema Chennai nunga scan ka agi. Maneni tetendangba balala agiba sülen anogo 2-3 tsüngda azü nungi aruba tashidak ka putet aser surgery agi. Tangbo ni iba tashidak anepogo," ta pai metetdaksü.

"Aditya-L1 khahettsüba sülen kü dang operation agitsü ajungshi. Operation ji agiba sülen ni chemotherapy agi," ta pai metetdaksü.

S Somanath-i pai iba osangji par kibong züngsemtem aser kinüngertem den lemsatepba sülen ang pa tetsübu ajema aküm, ta ashi.

"Ni küm shia temang tendangtsü aser scans agitsü. Ajisüaka tang atemabo ni anepadokogo aser kü mapa asentenshir tenzükgogo," ta paisa shisem.



TIR YIMYIM YIMOBILEM (EDITORIAL)

DIMAPUR SANGTENNÜ, MARCH (METSÜREMI) 05, 2024

LGBTQ+

- P Tiamongba Aier

Tanur asüdang nungi kidang, yimdong aser sentep nung Tsüngremi tebur aser tetsür yangluba aser tebur o tetsür na kibong küma soyapokya aoba indang tesayubatem dang angazüka aru. Ajsüaka kümtem süia arudang aser talisa tawa tanü alima nung atsüapong (gender) ana dang masü saka zünger mezümgma lir ta nisungtemi jembidang aser ano tebur-i tetsür aser tetsür-i tebur ama akümba, kasa apong sernung apuani ama aliba angudang kanga dang süngmanga repranger. Item nisungtem ya tanur asüdang nungi tim tesayuba agüja anitet asübo tanü parnoki iba tia ya majurula tasa aria bilemetsür. Naga lima nunga ibala nisungtem ya lir saka parnoki yimjak nung kangabo mesayui lia aruba nguogo saka February 29, 2024 nü Dimapur Tourist Lodge nung LGBTQ+ nisungtem atema sentong ka agiba ajanga joko asen lima nung parnoka jenjang ka amentetogo aser kobi melii iba telok ya kanga sashia tuluka küma aotsü ama tsüba bilemer. LGBTQ+ ta asüba ya Lesbian, Gay, Bisexual, Transgender and Queer lir aser + nungji Intersex, Asexual & others adener. US Mission to India ajanga tenzüka agiba "Rainbow Dialogues: All in this Together" project nung shilem ka ama Dimapur nunga LGBTQ+ nungertem asoshi iba sentong ayonga agiogo. Iba sentong ya Nagaland nung tang mezümg atema agi aser loktiliba nung LGBTQ+ nungertem agizüksü aser parnok nem mapa inyaksü maongkatem agütsütsü nükjidong nung ayongzük. Iba sentong agiba osang prokshiba sülen nisungtemi pei pei tebilemba jembir, kari anema jembir aser kari pusema jembir. Talisa social media sabang balala nung iba onük kanga bulua jembia arudar aser atangji iba ya tebilemetsü khuret tulu ka lir ama ajiteter. Nagaland ama Khristantem teimba ser aliba state ka nung LGBTQ+ nungertem lokti nung agizüksüsbaji tasak asütsü aser tamakok ang ajurutsü ama bilemer, kechiyong iba ya Laishiba tesayuba anema lir. Anungji sorkar, arogo aser telok balalai kanga süoki ia bilema iba onük atema mapa inyaksü nungdaker. Kanga dang tekümdangtsü kaji, tanübo LGBTQ+ nungertem reprangdangra taintem dang lir saka tanü alima tensa ya reprangdangra tanur aser lanur aika iba tsütsü shir libaliroba angur.

Tanü asenoki yimdong nung tebur chanutem tetsür-a masü tebur-a masü ta tereprangtsü yanglur aser süoshi subor senzüba ajurur. Külen tanur tetsürtem aser aiürtemia tebur kürak kümer senzüba angur. Tanü alima nung iba mopung ya aoner aser mekümdangra asen Naga nung lanur aser tanur aika iba mopung agi onshitsü ana nung dang lir. Tesüiba nungbo form amala nung Gender telemsa agütsüba nung Male/Female ta dang amshia aru saka tanübo Male/Female ta dang masü saka Others ta zülua amshir. Iba ya asenok Khristantemi kanga süoki ia bilemetsüba khuret ka lir kechiyong Laishiba nung Tebur aser Tetsür dak alaka tanga Gender kecha shia mali. LGBTQ+ tera ya bushia ora tsüraburtemi pei chirnurtem timi manitetba mesüra tanur meshitakba meteter sernung miimbanga ayuba, teyari mebushiba ajanga adokba ama ajiteter. Külen, iba onük nung Arogo-a densema lir kechiyong arogo ketdangsurtemi pei arogopurtem tim lenmang nung anitetsü tim. Asen chirnurtem iba mopung agi monshidaktsütsü atema saksalemtsü mapang tajungji tang ya lir anungji Arogoi anir asenoki LGBTQ+ tebilemetsü atema mapa inyaksü. Laishiba nung tetsür o tebur na kibong küma soyapokya aotsü indang shia aliba amaji tsüraburtemi chirnurtem anitetsüla aser Arogoia iba asoshi temulung agüja pulpit nungi dang masü saka ministry balaka tenzüka mapa inyaksü tim. Külen, ABAM Social Concern-ia yi, drugs aser tanga khurettem atema dang masü saka LGBTQ+ tebilemetsü atema asalentong yanglur inyaksüla aser lim arogotem nunga akangakanga inyaksü ajungmesotsüla. Dimapur nung February 29, 2024 nü LGBTQ+ pur sentong agiba ya Nagaland nung mezümgbuba aser tatembangbuba sentong südaktsüdi aser Laishiba tesayuba nung ajemdaker Nagaland for Christ yimyim ayimokja aliba tu mamai Arogo-i anir asenok Khristantemi libalirotsü merangdi.

OLEMSABANG

Tzüpokdak ama otzü bushiang

- S. Nuken Longkumer, Naga United

Tir Yimyim osang kaket ya asen Aor asoshi tzüpokdak ama bilema teti chiyongtsü tajung amai bushia zungang or agiang yangi tangazüksü mapa tajung aika asen oshi nungi angutsü, kokra idaki Kodak lima aotsüsa Tsüngrem o taret Tsüngrem o bushiteter temi zülutsür,. Ano idaki alima rangben nungi anguba chiyongtsütem aser otzü tajung nai ajurutsü. Yimyim nung otzü zülurtemi sobaliba inyakyim aser nai temeim mapa koda inyaker, temitemer koda yarir item ajak nung koda temoatsü ajurur item mapatemji angatetsü, otzü zülurtemi Kodak yimli osang tajung den alima teraksa den koda alitsü aser liyonga aotsü rajema angazüksü akok. Kibongtem teraksa yanglutetsüsa Tsüngrem o tarok maneni ajurutsü, tarutsü mapang nür kibong atepzüng nungi alima teraksa yanglutsü nupur rongnung tendaktsütsüsa bener arutsü, otzü zülurtemi aser bushiterteter asen nem mapa tulu ka agutsür. Alima nuing rongsen dang lira, sen ya lira oset ajak aseni bazar nung angur saka otzübo aseni bazar nung alitsü makok, item ajak ya aseni meteta lir saka aseni ngashi lon den meyokteper hiadoker amajok nung otzü jembir, tetsü oshi ya atamata otzü ka masü onsara senti lir. Israel nunger dang pei tetsü oshi amaba kin, tashi mangaba kin ta jembia lir. Tsüngremi ahutsüba tetsü oshi amadokra tia maka. Radio aser Tv. Tang nungio tajungba tetsü oshi yimyim nungi angazüksü, otzü zülur dang kanga pelati. Otzü zülurtemi ashiba agi alima nung nungtuogo rarar tulu Napoleon shibai otzü aser osangkaket kanga tsüba liasü ta ashir, kechiba tsüba liasü? Anungji otzü ya taküm aliba mepong ama lir, shidakba otzü dangi meyipa odi. Osangkaket nung Karbianglong Assam nungi anogoshi An shi kg. 45,000 – 50,000 arur, shirnoki inyaker kanga pelar, Naga nungertem jangratema chia jemdaksür, yamaji meranga inyakteter kipongte anüpalur, saka iba anshi ya asen lima majunger alitsü kechiba süra alitemo maliba agi majunger asütsü. Otzü jagi kechi sayur? Anogoshi Naga nunger mapa manguba atema aiben rarar aser jembia arur, Ak, An, Nashin, San amala mapa ya inyaksü makoker asü, rongsen maka mesüra lenmang sayur mali tangar lima nungi anogoshi Anshi paika aruteter? Tebilemdangtsü olura lir, ya shir tai? Naga nunger tulerter, takarter ya kechi tai? Naga lima election nungbo sen crore 10 nungi 40 tashi indokteter, nüpur majung asü lenirtem majung? Khristan lima tenümg agutsüa lir, ajakbo Khristan masü, ajakbo takar masü, ajakbo tuler temeteter masüotzü bazar nung mangur, Anshi alitemo asen lima maka nung majunger. Otzü zülurnem nungsen tagütsü asenoki kechi inyakteta lir?

Chief Minister Mr. N. Rio Govt. nung inyakteter F/H road atema kanga temulung agutsüa tang inyaka aoba angur, asenok ajaki tenümg agutsütsüla, iba road nungya rongsentem jenti lir ta angateta aruogo. Kanga dang pelar shirnoki mapang shia yariteper, tanü Naga lima nung khuret aika liaka, item maoa ken toktsür car lenmang yanglutsüra timtem aikabo malitsü, aji dang masü tarutsü election mapang sen aikabo meindoktsü, kechiaser Naga nungertem aika kibong yangluteter atatsü, iba ya car lenmang nungi aruba rongsentem asütsü. Ano tanu Naga lima tia ama MLA Minister tem kidang hia jema kazütepa mapatem amentetsüsa tashituluka lenmang car lenmang den sendaktepba lir, asen lima car lenmang ya takar tebu asütsü, anungji tanü lenirtem aser tashitemeteter den osang tajung ama lemsatepnüba onük ya Naga nunger ajak tangsa tang takar kümdakjang ta masü saka 50 x 50 yanglujang ta shinür. Iba mapa akoktsü asoshi chubatabaji car lenmang ya dang lir. Reprangang asen lima sensaker 80/c lir, nenok takarter 20/c dang lir, anungji koda sür Nagalima takar junga lir ta shitetsü? Saka tangar limajia küm aika aika nungang yangluteta lir. Rom yimti küm 300 shi nungang renemtet ta otzü nung lir asen limajia yamaji aotsü akok shibai metet. Asen Naga lima nung Industry kwika tanü samago, ken asenok ajaki bilemdangti. Alima yanglurtem, lenirtem tanishirtemi otzü meteta lir, angashir, saka mepong den raraba ama kümdaktsür, tia maka ta bilemer Naga nunger tuler aser takarter aika pei yimtsümg, tsükong toktsür town tulu, Kohima, Dimapur ama nung ki tajung aika yanglu liogo, asen tasolima azümgmeyaka lir. Mapang maliyonga asen tia ken reprangdi, asenoki tangar majung indang jempiteper, tenükmeremteper aser menden tuluba asoshi rakteper, saka ya pungmang nung anguba yimli masü. Tsüngrem teyanglur semang aser renemtsüba mapangji lir. India lima P.M Mr. Modi ama Nagalima Mr. N. Rio CM. ama khuret ya temela masü, nükla nung asenokia ken bendangangjo. Alima nung alirtemi aser nüpurtemi kechisa jembidir mesüra inyakdir, anungji iba lima ya ponglang makaba ongken lir, tajungdangbo tajung ajatsüla. Nagalima nung Mr. Rio ama aseni meinyaktetsü, nüpurtem majung mepong nung o tulu jempiteper, kechiba? Asenoki kenü danga khuret mebendang saka tangar nungsenbo jembir, meimchir ajakbo tabensa masü, kechiba nungsen jembir? Tenukmeremer, kanga tajung ka lir. Shirongi tsükmenatsü tanangtiba süngjang ta taku tasen yanglu, Tsüngrem mapa aser Pa sendongtem meimchiri mangatetsü. Asenoki otzü kar bushitsü merangti. Asen lenir M. Gandhi metsüjang Mr. Modi dangi yok, Dr. Clark metsüjang Dr. S.C. Jamir dangi yok, Lenir A.Z. Phizo metsüjang N.Rio dangi yok. Alima nung sen agi shisatsü alitsü tasak, rongsen aika nenok den lir saka ola madoker, kechiba Naga nungeri Naga nunger memeimer? Tsüngrem dang sarasademdi, shisatsü meshidi, telungjem nung tashi tulu lir anogoshi azünger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran linük nung oshi 12 nung Tasen Lai meyipzüka adokogo



Tawa London nung Iran nung minority oshi 12 nung meyipzüka adokba Laishiba sayadang tangokba noksa nung angur.

March 04, 2024: Alima nung Arogo tekeratiba ainba linük, Iran nung tang Khristan nütsüing million 1 shi lir, aser iba linük nung Khristantemi Farsi oshi nung aliba tekülem sentongtembo meimshia dang agütsüsa akümer.

Joko tangbo Iran linük nung Gilaki, Mazandarani aser tanga sensotemi oshi 12 nung Tasen Lai züngtetsü, kechiyong tawa iba linük nung minority oshi 12 nung Tasen Lai meyipzüka Laishiba adokogo. Iran nung oshi 62 lir aser iba nungjagi oshi 9 bo nütsüing million kati jembir, ta Korpu translating agency-i metetdaksü.

Korpu translating agency nungi Yashgin-i, "Laishiba meyipbaji Tsüngremi nüburtem kümzüksü atema dang masü saka mezümeshia aliba minority nüburtem nem tanaben taküm akhümket agütsütsü atema lir," ta metetdaksü.

2007 küm Khristan yimsü agizüker aser tang Turkey nung alir, Yashgin-i Tehran nungi mile 500 dak tema pilar aliba Shiraz yimti nung lar kibong züngsemtem kümzüksü atema la tenüing jungkai adoka mesangdongtsü mepishia liasü.

Iran nung Qashqai Turkic minority nungi Yashgin-i Khristan yimsü agizükba ajanga 2017 küm la anaben tashi jail nung puoka liasü. Iba sülen la Turkey linüki jena ao.

Küm tenet shi lir tang mezüing Qashqai oshi nung Tasen Lai meyipzüka adokba nung lai-a tongtibang shilem agiogo.

Nütsüing million 88 aliba Iran linük nung nütsüing shilem 50-ibo Persian oshi balala jembir aser minority lisopur telok tulutiba anaji Azeris aser Kurds lir.

Iran nung aliba Armenian Khristantem aser Assyrian Khristantemi mapang talangka nungi parnok oshi nung Laishiba adoktsü kanga yongyaa liasü. Kurdish Laishiba mezüingbubaji 1872 küm adok aser Azeri Laishiba

1891 küm adok.

Missionary Henry Martyn leniba nung mezüingbuba 'modern version' Laishiba 1846 küm renema liasü.

Transform Iran tentetsang, Lazarus Yeghnazar-i, parnoki regional yimtibatem nung Farsi oshi jembiba Arogotem tentetsüogo aser tang par organization-i yimti 50 dak tema nung Arogotem tenzükja lir, ta metetdaksü.

Unfolding Word's Open Bible Stories den külemi Transform Iran-i regional olasü nung minority oshi 22 nung Laishiba nung aliba otsütem meyipzüka liasü. Iran nung minority kari dang tetsü oshi nung züngteter, anungji tarutsü nung item oshi samatsüa akok ta mongintemi bilemer.

Armenian Khristan Lazaru Yeghnazar-isa, "Kentenmenü ajanga parnok tanela kongshir. Yisu menoa marura parnoki 'Khristantemi onok sobaliba wazüka ayu' ta shitetsü," ta ashi.

Korpu translating agency nung Director, Feridoon Mokhof-i, "Korpu nung inyakertemji linük security atema amokmeren ta bilema apur. 1979 küm Islamic revolution sülen Arabic ya yimsü dak sendakba official oshi ta sangdonga liasü. Islamic Republic of Iran-i maneni tamalen sorkari inyakba ama lisopurtem maitsü samatsütsü meranger," ta metetdaksü.

Laishiba nung Persian Chuba Xerxes indang shia lir, aser yimsüsüba tiyongtsüji Susa liasü; tanübo iba tesem nung Lak nungertem lidar. Cyrus Chubai Laishiba nung shia aliba Elam yimsüsüa liasü aser tang yangji Lur nungertem lidar. Tangbo oshi anaprongla nungji Tasen Lai adokogo, ta Feridoon Mokhof-isa metetdaksü.

"Lur nungertemi par linük menüingdaker saka parnok oshi aser sobalibaji wazüka ayutsü nungdak. Parnok oshi nung parnok ket nung aliba kaketji

Laishiba dang asütsü," ta pai ashi.

1974 küm university student asüba mapang nung pai Khristan yimsü agizüka liasü aser 1990 küm pai par Azeri oshi nung Laishiba meyipzüka liasü. Küm pongu lir sülen Iran arrtsülen Azerbaijan Bible Society tenteta northern Azeri nung Laishiba meyipzüksü atema pai Korpu tenteta liasü. Azeri oshi nung Korpu tetetzü "apu" lir.

Laishiba ajanga nisungtem tsüngda sendaktepdaksütsü atema pai mangdang yur inyak.

1998 küm Mokhof-i Gilaki oshi nung Tasen Lai meyip; iba sülen küm ishika lir Mazandarani aser Luri oshi nunga Tasen Lai meypa liasü, ajisüaka 2014 küm tashi nungang maparen atem.

Iba sülen Korpu agency-i Talysh, Tati, aser Ahwazi Arabic densema oshi balala nung Laishiba meyipba sülen tawa London nung oshi tasen 12 nung meyipzüka Laishibatemji sayaogo.

Taküm June ita tashi nung ano oshi trok nung Tasen Lai meyipba maparen tembangtsü.

United Bible Societies (UBS), Seed Company, Operation Mobilization aser Southern Baptist Convention indang International Mission Board den senteper Korpu agency-i oshi meyipzüker nisung 58 densema staff 73 shimer inyaker aser parnok shilem asemsü nungi shilem anabo Iran nungi inyaker.

Mokhof ya Hamgaam Council of United Iranian Churches nunga assistant superintendent lir. Iba council-i Iran nung house churches 850 repranger. Islamic Revolution sülen Tehran nung mezüing Khristan nütsüing renloka liasü; iba sülen küm 10-15 tsüngda satellite television ajanga linük tesem ajaklen asentenshi milak janrua liasü. Tanübo alima nung Arogo tekeratiba ainba linükji Iran lir.

ANOGO ABEN TSÜNGREM DEN

Ne sasa azüokang

Idangji Yisui pei nütsüingtem dang ashi, "Kari Kü sülen arunera, peisasa azüokang aser pei kangki apur Kü sülen anidakang." Mathi 16:24

Temeneni asenok nem pei atema dang bilemdaktsür, asen temulungjang Tsüngrem nungi pilar pei dangi meyipdaksür. Tekümetetji pei atema bilemba nungi Tsüngrem atema bilemba dangi meyipba lir. Khristan kati taküm ali tashi peisasa azüoka alitsüla. Asenok tatitangba tuluji peisasa dak temulung lemer Yisu sülen anidakbaji alitsü. Yakob aser Yohan asoshi tatitangji ibai liasü. Parnoki Yisu sülen anidaktsü shimtet saka Yisu yimli nung teti asoshi temaba menden tulu ana parnoki meshi (Mark 10:35-37). Yakob aser Yohan nati parnoki Yisu nütsüingsüba nung parnok taginüba aser tejangraba meindoknü. Parnok ama, asenokia ashir, "Kibuba, ni Na peladaktsüner, saka ni kong lir idakji dang liner."

Pei atema dang bilemeri taküm kecha timtem makai dang peria kaa dang jangratema liner. Asenok atitangbaji asen mapang aser merangba ajak iba lima alizüing atongtsü merangbaji lir. Kodang asenoki alima nükdang takok angur idangji asenok takok agi Tsüngrem tushiba ajanga Pa alimai anir alutsü meranger. Asenoki ashir, "Tang ni kü mapa nung, (asayaba or politics, mesüra kü kibong nung, ni Khristan mapa nung tenzükba nung) iba asoshi ni Tsüngrem tushiner!" Tsüngremi second hand sentsüwangshi maginer. Alimai iba lima konang bushitsü mesüzüker aser ken dang aliba oset bushitsü ajungshir. Nai mulungba alizüing bushitsü atitangba noktangang, itemji moajang ta Tsüngrem dang asüngdangang. Nesasa azüokang aser Tsüngremi ne dang jungkai adoktsüba mapa nung denang.

Arogoi tetsürtem akhangba manifesto ka pusemer

March 04, 2024: Taküm Putir, Anand Mathew-i, April-May ita nung Lok Sabha "March 8 nü amongtsü aliba election agitsü aser Ato International Women's Day kilonser, Narendra Modi-i nungtem nung onoki iba tokteptsü aliba Varanasi (Mahila Adhikar Sammelan) constituency nung Khristan sentong ya ayongzük," ta putirtem aser nun densema tetsür 2,000 dak temai 'tetsürtem manifesto' ka sayaogo.

March 3, 2024 nü Uttar Pradesh state kübok Varanasi parliamentary constituency nung sentong ka nung parnoki yimtenren party ajak dang linük nung kinü tanur no-menden nung lia raksaa indokba nokdangtsü atema telelemtetba agiang, ta takhangba agütsü.

National Crime Records Bureau (NCRB) report ajanga ashiba agi, linük nung ozüing alema tetsürtem anema inyakba ken otem shilem 4 agi teimba kümogo.

Varanasi nung ayongzükba Mahila Adhikar Sammelan (Women's Rights Conclave) sentong nungi Arogo lenirtem densema yimtsüingtem nungi tetsür aika aden aser parnoki yimtenren party tem nem takhangba onük 13 agütsü.

Putir, Anand Mathew-i, "March 8 nü amongtsü aliba International Women's Day nungtem nung onoki iba (Mahila Adhikar Sammelan) sentong ya ayongzük," ta metetdaksü.

Varanasi nung amenoka aliba Indian Missionary Society (IMS) nungi Mathew-i, iba manifesto ji yimtenren party ajak nem agütsütsü, ta metetdaksü. Manifesto ajanga tetsürtem anema inyakba ken otem tekeraba nung angadangtsü aser kinü tetsür no-menden nung lia raksaa indokba nokdangtsü atema takhangba agüja liasü.

Kasa manifesto ajanga Lok Sabha, state assemblies aser local bodies ajak nung tetsür nem menden shilem 50 shiteta yutsütsü aser tetsürtem graduate masü tashi angati shisaliok agütsütsü takhangba agüja lir.

Iba sentong nungi Conference of Religious of India aser Forum of Religious for Justice & Peace nungi lenirtema densema liasü.

OLONG PAITEP # 6717

Grid for crossword puzzle #6717 with numbered squares.

TIPLÉN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S ____ - (4)
13. Yagi ajak ashioxtür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ___ hi - (3)
16. Akümli nungi pilar - (3)

OLONG PAITEP # 6716 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioxtsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA



Anant Ambani aser Radhika Merchant na pre-wedding benjungmong nung nungtu gu kentener Rihanna-i shilem agiogo aser iba atema la nem Rs 50 crore tema agütsüogo. Gujarat kübok Jamnagar nung ayongzuka amongba benjung nung Rihanna-i 'Work', 'Diamonds', 'Wild Things', 'All Of The Lights', 'We Found Love In A Hopeless Place' kentem aten. Reliance Chairman Mukesh Ambani'er jabaso tanabusang Anant aser industrialist Viren Merchant'er jala Radhika na taküm July 12 nü kiyimba sentong agitsü.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Mon nung Assam Rifles temi NSCN (K Rebel) züngsem ka khaset



Kohima, Metsüremi/March 04 (TYO): Mon district kübok general area Sangsa village nung nisung apuba aser tashiyim amshia senotsü mechiba maparen inyaker ta itdangiter nungi osang tejangja angazükba sülen Assam Rifles temi March

3, 2024 aonung operation ka tenzuka liasü. Parnok anasai aoba mapang Assam Rifles tem dak injang khaloktsü aser Assam Rifles temia meyiper akha, ta sangdong Iba mapang telungpur ka

khaset aser ka apu. Kasa mapang automatic rifle ka, automatic pistol ka, grenades, injang aser rara nung amshiba ama oset balala ngutet. It dangiter osang ajanga ashiba agi parnok ya NSCN (K-Rebel) telok nungi lir, ta sangdong ajanga ashi.

Union minister Choudhary-i Gogamukh nung IARI lapoktsü

Dhemaji, March 4, 2024 (Agencies): Union minister of state for agriculture & farmers welfare Kailash Choudhary-i Indian Agricultural Research Institute (IARI) lapoktsüogo. Iba ya Dirpai Chapori (Gogamukh) nung Indian Council of Agriculture Research (ICAR) kübok lapok. Lakhimpur Lok Sabha MP Pradan Baruah, Assam education minister Dr Ranoj Pegu aser ICAR ktdangsurtemi union minister Kailash Choudhary meina ao. IARI campus nung multi-storied academic block ka, guest house ka aser student hostel ana lapoktsü. Prime Minister Narendra Modi-i May 26, 2017 nü Dirpai nung Rs 145 crore endoka yanglutsüba IARI project atema

lung azüngja liasü. Iba ya linük nung agriculture research institute tasembuba lir. Tesüiba nung Delhi aser Jharkhand nung agriculture research institute ana lapokogo. "PM Narendra Modi-i aniba Centre sorkari linük nung agriculture sector ajungkettsü atema temulung agütsür" ta minister Choudhary-isa ashi. Centre sorkari agriculture budget ajungketogo aser tesüiba küm pungu tsüngda yimdak aliba aluyimertemi anasü agi teimba züsenteter ta Choudhary-i ashi. IARI ajanga Northeast region nung aluyimertem yaritsü aser natural (organic) farming o modern agriculture technologies len anitsü ta paisa ashi. Union Minister of Agriculture Arjun Munda-ia

web-casting ajanga iba sentong nung aden aser pai ashiba agi "Gogamukh nung IARI tasembuba lapokba ajanga linük agriculture sector nung alizüng ka tongogo." Minister Munda-isa agriculture research department nung ktdangsurtem dang mangdang yur mapa inyakttsü aser aluyimertem ajangzükdaksütsü ayongzük. Iba sentong nung IARI Director Dr AK Singh, ADG (Seed) of ICAR Dr DK Yadav, MP Baruah aser Assam Minister Ranoj Pegu nungeri o jembi. Külen, Department of Agriculture Research & Education Secretary cum Director General of ICAR Dr Himangshu Pathok-ia web-casting ajanga jembi.

Sonowal-i Assam nung Ayurvedic college tanabuba lung azüngtsü

Guwahati, March 4, 2024 (Agencies): Union Minister Sarbananda Sonowal-i Assam nung Ayurvedic college tanabuba lapoktsü atema lung azüngtsüogo. Goalpara district kübok Dudhnoi nung iba college lapoktsü. Iba ajanga Assam nung küm 76 sülen Ayurvedic college tanabuba lapoker asütsü. Union Minister Sonowal-isa Kokrajhar aser Baksa nung 50-

bed AYUSH hospital ana lapoktsü lung azüngtsüogo. Assam nung sobaliba mozü kanga takar lir aser tesüiba nung aser talisa Congress-i aniba sorkar mapang senzuka toktsü. Sonowal-i modern aser traditional medicine sendakteper healthcare system tajungba akümtsü nungdakba indang jembi. Ayurvedic college tasenji Rs 70 crore endoka yanglu aser undergraduate course (BAMS)

atema kaketshir 100 admit asütsü. Tarutsü nung postgraduate courses agitsü aser campus nungsa Ayurvedic mozütem yanglutsü atema herbal garden aser unit ka lapoktsü. Kokrajhar aser Baksa district tem nung 50-bed integrated AYUSH hospital anaji Rs 30 crore endoka yanglutsü. Iba ajanga Kokrajhar aser Baksa nung healthcare facilities tajungba akümtsü.

Kaziranga kübok Kohora range nung Jeep safari shibangtsü

Guwahati, March 4, 2024 (Agencies): Prime Minister Narendra Modi-i Assam nung Kaziranga National Park a Tiger Reserve semdangtsü aliba atema March 7 nungi 9 tashi Kohora range nung Jeep Safari shibangtsü. Maneni, kasa range nungsa March 8 nungi 9 tashi Elephant Safari shibangtsü. Ajisüaka tanga range tem

nungbo akhi ama Jeep Safari aser Elephant Ride alitsü, ta park ktdangsurtemi ashi. Prime Minister Narendra Modi-i March 8 nü tang mezüng atema Assam nung UNESCO World Heritage site Kaziranga National Park and Tiger Reserve semdangtsü. PM Modi-i March 8 nikongdang Kaziranga atongtsü

aser Police Guest House nung yipzüktsü. Tasüngji pai National Park indang Kohora Range sema senzütsü. Prime Minister Modi-i UNESCO World Heritage site semdangtsü aliba ajanga Assam sorkar aser Forest Department-i kanga dang yongyaseta mapa inyakdar.

Washington DC nung Nikki Haley-i Trump akok



Washington, Metsüremi/ March 04 (Agencies): Nikki Haley-i Washington DC nung Republican primary nung Donald Trump akok.

Republican party nungi US tir asoshi tokteptsü atema 2024 campaign nung lai taoba tir madak takok anguba ibai mezüngbuba alitsü.

La South Carolina nunga tamakok ajuru, koba lar state lir. Saka US puti otsü nung

Republican primary ka takok anguba tetsür la mezüngbuba alitsü.

Ajisüaka Haley dang Trump ya kanga agi temaba jenjang nung lir aser November election nung Joe Biden ajurutsü amai ajiteter.

Washington DC nungi Haley-i Republican delegates 19 prong angutsü, anungji linük ajunga nung la indang delegates 43 akumtsü, saka Trump tang

247 nung lir, ta CBS osang ajanga ashir.

Taoba mapang US ambassador to the UN inyaka alila Haley-i vote shilem 62.9 angu asür Trump-i vote shilem 33.2 angu.

Iba takok ya yimya ka amai ajiteter, kechiaser US yimtiba nung Democrats timba lir aser iba yimti nung Republican züngsem 23,000 shi dang lir.

Iba primary nung Republicans züngsem 2,035 shilem agia liasü ta ashir.

Tang tashibo Republican campaign nung state primary ajak Trump-i amokbanga aru aser tan hopta Super Tuesday nung delegates timba angutsü temulung lema lir. Mongulbarnü state 15 aser US territory ka nungi voters temi par candidate shimtsü. Ibai nominating contests atema anogo tulutiba alitsü, kong Republican delegates 874 teyari lir.

Haley-i March 5 tashibo tokteptsü nangzüka lir, aser iba Super Tuesday nung nisung meyirijang aikati vote agütsütsü.

Haiti tepuokdak nungi nisung 4000 ajenba sülen emergency benokogo

Port-au-Prince, Metsüremi/ March 4 (Agencies): Hopta tatemi linük nung tepuokdak tuluba ana nung mepetmesü adoka tepuokertem meyrejang aika ajenba sülen Haiti sorkari emergency sangdongogo aser curfew benokogo.

Gonda 72 atema state of emergency benokogo aser sorkari ashiba agi, parnoki nisung tepsetertem, nisung pur aoertem aser tanga ozüing raksartem shirnok jenaogo parnok ajak bushiteta pudentsü.

Curfew ya aonung 6 ako nungi anepdang 5 ako tashi benoktsü.

"Curfew shidak benoktsü aser aibelena alirtem pudentsü atema temzüng ozüing kübok tashi ajak amshitsü asoshi police nem tetuyuba agütsüogo," ta Finance Minister Patrick Boisvert-i ashia, shibai Ato Kilonser bendangleni orr aliba mapang pa mapa belenzüka lir.

Linük nung ozüing alema inyaksangshiba tashi tait lokti tentet balala den mangatettep adoker aliba mapang linük süngjema kümdaktsütsü atema PM Henry tang United Nations dang nungi security force teyari meshiba mapang ka lir.

Jimmy Cherizier-i aniba teloki Henry menden nungi atsüngtoktsü merangdar. Cherizier ya taoba mapang police officer ka liasü aser pa dang Barbecue ta ajar.

National Network for Defense of Human Rights nungi Pierre Esperance-i ashiba agi, Honibar aonung mepetmesü adokba sülen National Penitentiary-i asateter aliba tepuoker 3,800 rongnungi 100 shi dang mejeni lir.

AFP news agency osangbener kati Deobarnü tepuokdak semdangogo aser pai ashiba agi, parnoki tasümgang ter dak tema kima yua aliba nguogo. Kishi lapoker liasü aser ki telung nung nisung ishika dang liasü, ta parnokisa ashia.

Kasa mapang nung Reuters news agency sangdong ka ajanga, tepuokdak police office tem mangu aser kishi tongtiba lapoker liasü.

"Onok takdang nung kü kija anungogo," ta tepuoker kati Reuters dang ashia. "Onok mejanga aliba mapang injang ola angashi. Tepuokdak tenokdangtsü agütsür aliba raksaogo."

Haiti sorkari sangdong ka ajanga ashiba agi, ozüing alema inyaksangshiba teloktemi iba tepuokdak aser ano Croix des Bouquets facility amakba police temi nokdangtsü merang. Esperance-i ashiba agi, tanabuba tepuokdak nungi tepuokertem kwika jena ao iba indang osang tejangja memetet. Iba tepuokdak nisung 1,450 yua liasü.

Sorkarisa, tepuokdak amakba sülen tepuokdak inyakerter aser tepuokertem aika yiruogo, ta ashia.

Maneni sorkari, tensa mejungaka nüburtem kanga süngjema ataba atema kanga pelaba lemsatepogo.

PM Henry atsüngtoktsü atema Cherizier-i ozüing alema inyaksangshiba teloktem ayongzüka sülen Haiti nung tawa tensa kanga mejungi kümogo. Cherizier ya teloktep telok ka tekolak lir aser pa nem UN aser US natia tenokdangba agütsür lir.

Tepuokdak voluntary inyakba nisung kati Deobarnü ashiba agi, tepuokdak tongtiba nung tepuoker 99-i parnok takdang nungi mainshitsü telemtetba agia liasü. Item tepuokertem rongnung mapa nungi anener aliba Colombia nung sepaitem densema lir, shirnok taoba tir Jovenel Moise tepsetba ken o nung sendaka lir ta temulung melemi tepuokdak yua lir.

Ketdangsurtemi nüburtem dang kümdanga alitsü aser National Police nem teyari agütsütsü metetdaktsüogo, shirnoki jena orr aliba tepuokertem aser iba lendong bener arutsütem aputsü atema takokba tashi inyaktü.

Deobarnü tashi nung Ato Kilonser kong ali aji mejangjai liasü. Henry ya Kenya nungi meyipa arutsü liasü, kong pai item ozüing alema inyaksangshiba teloktem azüoktsü atema security dak sendakba nung tenangzüktepba ka yangluogo.

Mepetmesü adokba sülen linük nung nisung 15,000 shi pei ki toktsür jenshiaogo aser parnok ya tesem 10 nung jenoka lir, ta UN indang International Organization for Migration (IOM) sangdong ka ajanga metetdaktsü.

Henry shiba 2021 küm Ato Kilonser aküm pa taküm February ita mapa nungi anentsü liasü, ajisüaka pai Guyana nung regional summit ka amenba mapang, tensa tajungba akümba sülen 2025 küm August ita nungang election ayongzüka agitsü ta shiogo.

Haiti nung tatembangbuba election 2016 küm agia liasü.

ADVERTISEMENT FOR THE POST OF PROJECT MANAGER AT CTC

The Clark Theological College (CTC) hereby invites applicants for the post of Project Manager at CTC.

Basic Criteria:

- o He/she must have a minimum qualification of graduate and above in Theology or any other Secular stream.
- o He/she must have a strong Christian commitment to serve the College.
- o Preferably, he/she must have some years of work experience in the relevant field.

Salary : As per the CTC RoP 2019.

Interested candidate can submit their application with the related documents on or before March 20, 2024 by post to:

**The Principal
Clark Theological College
Aolijen, Mokochung-798601, Nagaland, India
Or Email to - ctcprin@gmail.com**

For any queries kindly contact :
Principal, CTC - +91 8837002616 / 8413992235

**Sd/-
Prof. Rev. Dr. A. Temjen Jamir
Principal, CTC**

Thailand court-i Yingluck Shinawatra nem temeden agütsüogo



Bangkok, Metsüremi/ March 04 (Agencies): Küm Metdong rongnung ter dak tema jakdang ato kilonser inyakba mapang ochimashi mapa inyak ta tai tonglokja aliba ken o nung Thailand indang tematiba court-i Yingluck Shinawatra nem temeden agütsüogo.

Hombarnü iba obendang agütsüba ya nungtugu Shinawatra'er kibong asoshi legal tsütsü takok tasenba alitsü. Yingluck teti Thaksin ya meshidakba nung tashi amshiba mechi ita trok tepuokdak yur parole nung February ita chiok, shiba ato kilonser kümsük ana inyakerter aser Pheu Thai Party nung lenir ka lir.

Yingluck aser ano dangar nisung pongui sen 240 billion baht (\$6.7bn) meshidaki amshi aser Yingluck sorkar indang ki o jen yanglutsü project atema bidding maparen shidak meinyak ta tai tonglokja liasü.

Thailand indang Supreme Court nung aliba obendanger nisung toku prongi parnok ajak medentsü aser iba mapang contract angur media outlins tulu ana ajangzüksü tebilemba mongutet ta sangdong ka nung ashia.

"Iba project ya temzüng ozüing nung aliba ama inyakerter," ta court ajanga sangdong nung ashia.

Iba ken o jembidang Yingluck yabo meliasü aser la melen okatsür arua liasü. Sorkar sen dollar aika akoksatsüsa subsidy scheme ka mechi tepuokdak ayutsü aliba nungi jenshia la 2017 nungi bendang lima lia aru.

Iba ken o ya Thailand indang anticorruption commission ajanga benok aser telangzüba

agütsütsü anogo 30 lir.

Metdong rongnung Niwattamrong Boonsongpaisan, shiba deputy prime minister ama inyakerter aser ashiba agi, iba ken o agentsü asoshi parnok ajak nem court-i taochi sayu.

Arishi küm 56 tain Yingluck ya Thailand nung tetsür ato kilonser mezüngbuba ama 2011 nungi 2014 tashi inyakerter lir mitkar temi lar sorkar atsüngdoka liasü.

2011 election mapang aluyimer nem jang subsidy agütsütsü nangzüka nung temulung magütsüba mechi 2017 küm Thailand indang Supreme Court ajanga Yingluck meliaka küm pongu tepuodak ayutsü obendang agütsü liasü.

Thaksin ya 2006 küm ato kilonser menden nungi atsüngdokba sülen küm 15 bendang lima nung ali saka August ita meyipa shilanga liasü. Pa tepuokdak mezüng aonung mozü kidangi anir ao aser iba sülen küm ti tepuokdak ayutsü aliba chuba-i tatok agütsü küm ka kumtsü.

Pa meyipa shilanga sülen kera tepuokdak nungi chiockba ajanga pai miima par tsükchir den tezüngzüktep kar yanglua alitsü südi ta olulu adok, saka par tembar aser tsükchir temi magizük.

Thaksin-i Ato Kilonser Srettha Thavisin sorkar nung tongti shilem agitsü akok ta jembir, kechiaser par jala Paetongtarn ya Pheu Thai Party lenir aser ato kilonser akumtsü temsüa lir.

Ajisüaka Thaksin-i pa yimtenren nungi anisüngzüker aser temang nung timtem balala lir ta ashir.

India tetsür aser tebur TT team Paris Olympics atema qualify süogo

Metsüremi/March 4, 2024 (Agencies): India tetsür aser tebur TT team-i Hombarnü otsü tasen ka yanglua tang mezüngbuba Olympics atema qualify süogo, koba world rankings dak ajemdaker telemtetba agir.

Taoba ita Busan nung World Team Championships Finals tembangba sülen team asaya atema spot tenet anunga liasü. Iba asayamung ya Paris Olympics atema qualify asütsü asoshi tatembangbuba maongka liasü. Spot tem ya rankings dak ajemdaker agütsüogo.

"World Team Ranking nung temaba jenjang nung aliba team tem shirnok qualify mesüi liasü parnok Paris 2024 atema

qualify süogo," ta ITTF-i ashi. Tetsür asaya nung India team 13buba, Poland 12buba, Sweden 15buba aser Thailand ta Paris Olympics atema qualify süogo.

Kasa mapang nung Croatia (12), India (15), aser Slovenia (11) nunger tebur team asaya atema qualify süogo.

"Talangka atar India team Olympics nung team asaya atema qualify sütetogo. Ni iba ya mapang talangka ataogo. Ni Olympics nung tang agi pongubenbuba asayatsü lir, ajisüaka iba ya kanga dang tongtibang. Linük tetsür team nema tenüngsang agütsür shirnok otsüsütsüa qualify sütetogo," ta asayar tejen Sharath Kamal-i tweet asü.

Iba asayamung atema qualify sütetba ya India table tennis puti otsü nung alizüng tongtibang ka tongtetba asütsü, kechiyong 2008 küm Beijing Olympics nung mezüng benoka asayaba sülen tang mezüngbuba India team, team event nung shilem agitsü lir.

India tetsür aser tebur team ITTF World Team Championships Finals pre-quarterfinals nung tsükatokba sülen Olympic atema qualify mesüteti liasü.

Iba asayamung nung Sharath-i anir tebur team South Korea-i 0-3 agi tsükdaksü aser Manika Batra-i aniba tetsür team-a Chinese Taipei-i 1-3 agi tsükdakja liasü.

Rankireddy- Shetty na French Open nung shilem agitsü

Metsüremi/March 4, 2024 (Agencies): Asayamung asem tashi nung tanabuba jenjang nung tembangba sülen India nunger tarep Satwiksairaj Rankireddy aser Chirag Shetty na Mongolbarnü nungi tenzüka USD 850,000 French Open Super 750 badminton tournament nung asayatsü.

World No. 1 India nunger tarep ya 2023 küm November ita China Masters Super 750 aser January ita Malaysia Open Super 1000 aser India Open Super 750 nung tanabuba jenjang nung tembanga liasü. French Open nung tebur tarep asaya akoktsü imlartem rongnung tenata densema lir.

Iba asayamung nung shilem agiba ya tena asoshi maongka tajung ka asütsü, kechiyong Paris Olympics asayaba mapang iba asayamung asayatsü aliba Porte de la Chapelle nung Adidas arena nung ya badminton asaya asayatsü.

India nunger tarep yagi iba asayamung 2022 küm kokogo aser taküm tena mezüngbuba asaya Malaysia nunger tarep Ong Yew Sin aser Teo Ee Yi na den asayatsü.

Tetsür kija asaya nung

Sindhu-a asayaba angutsü. La mezüngbuba asaya Canada tsür Michelle Li den asayatsü aser lai iba asaya kokra la Spain tsür Carolina Marin den asayatsü, shiba den a Denmark Open semi-final nung mangatetep adoka liasü.

Tebur kija asaya nung world No. 7 HS Prannoy-a mezüngbuba asaya China nunger asayar Lu Guang Zu den asayatsü. Taküm pai India Open nung semifinal tonga asayaogo.

Paris Olympic nung asayatsü atema qualify asütsü merangba mapang Lakshya Sen world No 19-i asepzüka luogo aser pa asoshi iba asayamung ya kanga tongtibang asütsü. Pa mezüngbuba asaya Japan nunger asayar Kanta Tsuneyama den asayatsü.

Taoba mapang world No 1 asayar Kidambi Srikanth-a mezüngbuba asaya Chinese Taipei nunger asayar Chou Tien Chen den asayatsü aser Priyanshu Rajawat-a world No 1 asayar Viktor Axelsen dena sayatsü.

Tetsür tarep asaya nung Treesa Jolly aser Gayatri Gopichand na külem India tsür Tanisha Crasto aser Ashwini Ponnappa na den asayatsü.

James Franklin Sunrisers Hyderabad pace bowling coach kümogo



Ajsüaka pa tang mezüngbuba Indian Premier League nung coach ka ama shilem agitsü renema lir.

Arishi küm 41 tain taoba mapang asayar ya English county cricket nung Durham coach mapa inyakogo aser iba den pa Pakistan Super League team Islamabad United indang assistant coach liasü.

SRH nung Franklin maneni taoba mapang teammate Daniel Vettori den longjemtsü, shiba 2023 IPL sülen team head coach asütsü shimogo.

Taoba mapang tena county cricket nung Middlesex nung aser Hundred nung Birmingham Phoenix nung külemi inyakogo.

Maneni HRS pur taküm Australia nunger asayar Pat Cummins lenisüba nung asayatsü.

Sunrisers Hyderabad pur IPL 2024 nung mezüngbuba asaya March 23 nü Eden Gardens nung Kolkata Knight Riders den asaya tenzüksü.

New Delhi, Metsüremi/March 4 (Agencies): Sunrisers Hyderabad-i Hombarnü sangdong ka ajanga taruba Indian Premier League season atema pace bowling coach mapa abentsü asoshi taoba mapang New Zealand nunger fast bowler James Franklin shimba sangdongogo.

Franklin-i iba mapa ya taoba mapang South Africa nunger fast bowler Dale Steyn ket nungi melenzükogo, shibai pa jurila maparen kar aliba ajanga taruba IPL nungi anisüngzük

agütsütsü mepeshia liasü. "Dale Steyn jurila maparen kar aliba ajanga taküm onok rongnungi shilem magitettsü aser pa melena James Franklin Pace Bowling coach asütsü shimogo," ta SRH-i parnok indang social media sabangtem ajanga metetdaksü.

Franklin asaya aliba mapang 2001 nungi 1013 tashi nung New Zealand team nungi Test 31, ODI 110 aser T20I 38 nung asayaogo. Pa 2011 aser 2012 IPL nung Mumbai Indians nungi asayaogo.



Sylhet nung Bangladesh aser Sri Lanka na tsüngda T20I asayamung metenzük tsüngda captain Wanindu Hasaranga (tabelen) aser Najmul Hossai Santo na marok amer tangokba noksa nung angur.

ICC Men's Player of the Month atema Jaiswal nominate süogo

New Delhi, Metsüremi/March 4 (Agencies): India nunger opener Yashasvi Jaiswal tang mezüngbuba February ita atema ICC Men's Player of the Month asoshi nominate süogo.

England den asayaba mapang pai kanga junga asayaba ajanga India team nem teyari tulu agütsüogo aser pa iba naroküm asoshi nominate asütsü kanga temsüa lir. Pa den New Zealand nunger asayar Kane Williamson aser Sri Lanka nunger asayar Pathum Nissanka nata nominate süogo.

England den asayaba mapang Jaiswal-i February ita Visakhapatnam aser Rajkot na nung atonga double century yanglua liasü, aser Test asaya nung innings ka nung six timba azükba asayar kümogo. Pai six 12 züka liasü.

Maneni pai Ranchi nung asayaba mapanga mezüngbuba innings nung half century ka yanglua liasü.

Kasa mapang nung Williamson-ia February ita kanga junga asayaogo. February ita Test ana asayaba mapang pai ajak senteper run 403 yanglu aser Player of the Series naroküm ngua liasü. South Africa den asayaba

mapang Mount Maunganui nung mezüngbuba Test nung pai century ana (118 aser 109) yanglu aser Hamilton nung tanabuba innings nung run 133 yanglua liasü.

Maneni Nissanka-a Afghanistan den tawa ODI asem aser T20I asem asayaba mapang kanga junga asayaba sülen pa iba naroküm atema nominate süogo.

Pai Pallekele nung asayaba mapang ball 139 nung run 210 yanglua Sri Lanka nunger asayatem rongnungi ODI nung mezüngbuba double-century yanglua liasü.

Iba sülen tasembuba ODI asaya nunga Nissanka-i ball 101 nung run 118 yanglua Sri Lanka team takok dangi ani aser T20 asaya tatembangbuba nunga pai half-century ka yanglu. Ajaka senteper Nissanka-i February ita ODI nung run 346 aser T20I nung run 91 yanglua tang mezüngbuba iba naroküm atema nominate süogo.

ICC Women's Player of the Month award atema UAE tsür Kavisha Egodage aser Esha Oza na aser Australia tsür all-rounder Annabel Sutherland nunger nominate süogo.

BILEMDANGANG
"Memerangdangi tamakok otsü tejembi."